

sampt dem außsehen vnd Brustwehren / deßgleichen die größe der Basteyen / Bollwercken / Katzen vnd alle andere gelegenheit / darzu auch wol vnd fleißig warnehmen vnd absehen die winckel vnd krüme der strassen / sampt andern / so hier zu nötig ist / damit man solches alles nach dem kleinen maßstab perfect verjüngt / auffzeichnen mag.

So diß also geschehen / solle man ferner / nach vnterricht des ersten Exempels im achten Capitel von zweyen vnderchiedlichen Thurn oder andern höhen (so in der selben Stat / Bestung oder Castel stehe) absehē alle die vornembsten gebäu desselben orts oder stat / als alle andere Thurn / Kirchē / Rathaus / Collegiē / vñ anders / etc. welcher ort der gemelten geböwen auch durch ander mittel / als durch die leng der strassen zumessen / absehen der winckel / etc. mögen gefunden werden.

Da nun dieses alles auch gethan / solle man den vmbfang oder begriff solcher Stat / nach dem verjüngtē maßstab / nach vnterweisung des funfften Capitel dieses theils / übertragen die Bollwerck / Katzen bedeckte wegen / breiten vnd leng der strassen / nach behörlicher proportion verjüngt / auffß papier oder pargement zeichnen / alles in solcher form vnd gelegenheit / wie es in der groß befunden / vnd so man die vornembsten gebäu der Stat / als vorgemelt / von zweyen Thurn abgesehen / mag man die ort dahin sie gehörn / nach vnterricht des ersten Exempels im vorgehenden Capitel finden / vnd als dan auch die zwey ort oder Thurn / davon man abgesehen / an ihre behörliche stelle ordiniern vnd einzeichnen.

Als dan mag man nach solcher abgemessenē Stat / Bestung oder Castel eine andere / nicht allein widerumb abstecken / sondern auch die selbe / nach vnderweisung des viertē Capitel dieses theils / vergrößern oder verkleinern / deßgleichen mit hülff des Quadranten / Compass / Ketten oder Nuten / die Bollwerck / Strassen / Wasser vnd alles anders in ihrer proportz darein bringen / welche wir dem fleißigen künstler (der auß deme / so wir hirinnen gelehrt / durch täglichen vielfeltigen gebrauch vnd übung / nicht allein diß / sondern andere mehr kunstliche sachen / wirt können verrichten vnd volbringen ) vmb geliebter künste willen schließlich befohlen haben wollen.

Beschlus.